

Illerfinnik angerlaassilluni assartuinnermut ikiorserneqarsinnaanermut piunasaqaatinik illuinnaasiunngitsunik aalajangersaalluni pisortanit ikiorsiissutit pillugit malittarisassat atuuttut allanngortinneqarnissaannik siunnersuummik Naalakkersuisut kingusinnerpaamik UPA2020-mut saqqummiussaqaarnissaannik Inatsisartut aalajangiiffigisassaattut siunnersuut.

(Inatsisartunut ilaasorta, Siverth K. Heilmann, Atassut)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Aappassaaneerinninneq

Naalakkersuisut Ilaqtariinnermut Peqqissutsimullu Ataatsimiititaliaq isumaliutissiissut pillugu qutsavigaat.

Siunnersuutip siullermeerneqarnerani Naalakkersuisut ilisimatitsipput, siullermeerneqarnerata kingorna sapaatip akunnerani tulliuttumi ilaatigut kommunit pisortanit ikiorsiissutit pillugit inatsisunik aaqqissuusseqqinneq pillugu ataatsimeeqatigineqassasut. Tamatuma kingorna Ilaqtariinnermut Peqqissutsimullu Ataatsimiititaliap Naalakkersuisut qinnuigisimavai, siunnersuummik aappassaaneerinninnermi, killiffik pillugu kiisalu siunnersuummi matumani ajornartorsiut pineqartoq pillugu ataatsimiinnermit angusarineqartut pillugit nassuiaateqaqqullugit.

Tassunga atatillugu Naalakkersuisut sinnerlugit ilisimatitsissutigisinnaavara, ullut 25. aamma 26. april workshoppertoqarsimammat qulequtalimmik ”Nammineq pilersornerup annertusarneqarnissaa aamma sulisussat amerlineqarnissaat”. Pisortanit ikiorsiissutit pillugit aamma suliffeerunnermi ikiorsiissutit pillugit inatsisit pillugit aaqqissuusseqqinnissap piareersarneqarneranni immersueqataanissaq siunertaralugu kommuninit, Sulisitsisunit aamma Namminersorlutik Oqartussanit sinniisut workshoppimi peqataapput.

Kommunit, aaqqissuusseqqinnerit suleriaatsinik pisariaqanngitsumik pisariusunik atorunnaarsitsisut ujartorneqarput. Ilaatigut pisortanit ikiorsiissutit pillugit inatsisissap pisariinnerunissaa kissaatigineqarpoq. Taamaalilluni inatsit pillugu nukissanik atuinikinneruffiusumik sulisoqartalissaaq, aamma innuttaasut pisinnaatitaaffitik piviusut pillugit ajornannginnerusumik paasisaqarsinnaalissapput. Tassunga atatillugu illerfinnik angerlaassilluni assartuinnermut ikiorserneqarsinnaanermut atatillugu ajornartorsiut taaneqanngilaq.

Naalakkersuisut taama oqaaseqarlutik siunnersuut itigartinneqassasoq inassutigaat.